

## Nedodirljivi direktor ne želi razgovarati sa sindikatima

**Jednog od predstavnika radnika, Spahića, osiguranje spriječilo da se obrati, a drugog, Buljugiju, direktor prekinuo u govoru**

E. GORINJAC 20/11/2010 16:30:00



**Željeznička stanica: Žutom trakom ograničen pristup generalnom direktoru**

Nakon niza upozorenja na nepravilnosti u poslovanju nove Uprave "Željeznica Federacije BiH", na koje već neko vrijeme ukazuju sindikati, generalni direktor ove kompanije Nedžad Osmanagić jučer se, u organizaciji Inicijativnog odbora za formiranje vijeća uposlenika, u holu Željezničke stanice u Sarajevu obratio radnicima.

**Osmanagić je više puta optužio čelnike sindikata da koče napredak u poslovanju firme, a ponovio je i poznatu činjenicu da je ŽFBiH u katastrofalnom stanju i ozbiljnoj finansijskoj gabuli.**

### **Kredit operativan**

- Sve su oči uprte u ovaj kredit od 79 miliona maraka i čujem da do vas dolaze dezinformacije da od toga nema ništa. Kredit je od danas operativan. Drugo, nema više nedodirljivih u ovoj firmi, jedini sam ja nedodirljiv. Šalim se, ali sam s druge strane i ozbiljan. Jedino što je nedodirljivo jeste da dovedemo stvari na pozitivnu nulu - rekao je Osmanagić okupljenim radnicima.

Nekolicina njih govor je podržala aplauzom, dok su drugi komentirali da aplaudiraju oni koje je direktor doveo na ovaj svojevrsni zbor radnika da ga podrže.

Predsjednik Uprave rekao je i da ovaj kredit ne znači ništa ŽFBiH, da se njime "mogu srediti neke stvari s bankama i isplatiti tri zaostale plaće", za koje je obećao da će biti uplaćene do sredine decembra.

Napomenuo je i da ŽFBiH ima 80 miliona tekućeg duga, a naplativih potraživanja 20 miliona, dok se ostalo, kako je rekao, mora nadoknaditi radom.

## Površni odgovori

Nedavnu smjenu 42 direktora opravdao je njihovim neradom i negirao navode čelnika sindikata da je "na ta mjesta doveo svoje poltrone".

**Iako je na jučerašnjem okupljanju dao mogućnost da se prisutnima obrate i sindikalisti i da postavljaju pitanja, Muniru Spahiću, predsjedniku Sindikata željezničkih radnika, to je uskratilo osiguranje, dok je Vernesa Buljugiju sam Osmanagić prekinuo u obraćanju.**

**Generalni direktor poručio je da s njima nema o čemu više razgovarati i da "od danas on govori, a da su predsjednici sindikata svoje već rekli, jer ne žele dobro firmi", uz povik "nemojte da vas ja povaljujem ovdje".**

Na pitanja čistačica kada će im biti osigurana osnovna sredstva za rad, direktor je obećao da će se postepeno sve riješiti, a na ostala pitanja uglavnom je odgovarao površno i upućivao radnike da se prvo obrate neposredno nadređenima prije nego što dođu do njega, jer se on mora baviti ozbiljnim stvarima u firmi.

## Kresanje plaća u Upravi

Na navode sindikata da je plaća generalnog direktora 12.000 KM, Osmanagić je uzvratio kako je jučer na sjednici čelnika firme donesena odluka da Upravi plaće budu smanjene za deset posto, a da umanjena ne bude onima koji su ugroženi.

**- Prethodni generalni direktor imao je platu 3.500, a ovaj ima 4.860 KM, plus reprezentaciju i druge naknade... Ostalim članovima Uprave plata je dignuta sa 2.500 na 2.800 KM. Dobio sam zapisnik u kojem se kaže da će plata biti smanjena svima. U četvrtak je plata obračunata, ali predsjedniku Uprave nije smanjena, učinjeno je to tek na moju intervenciju. Uprkos Osmanagićevim tvrdnjama, umanjene su i najniže plaće - tvrdi Spahić.**

## Direktori, savjetnici i sekretarice

Uprkos činjenici da je Vlada FBiH naložila, a Nadzorni odbor i Uprava prihvatili da se obustave sva nova zapošljavanja u ŽFBiH, Buljugija kaže da je prijem novih uposlenika nastavljen bez obzira na finansijsku situaciju.

**- Po političkoj liniji u svojstvu savjetnika bukvalno ni za šta zaposlen je Stjepan Šutalo, nelegalno je postavljen Džemal Subašić za direktora, Abaz Ćutuk za savjetnika generalnog direktora za bezbjednost... Primaju se i sekretarice u kabinet generalnog direktora pored već zaposlenih. Tu je i niz drugih nezakonitih zapošljavanja. Samo posao ne dobivaju oni koji nam stvarno trebaju - kaže Buljugija.**

## Pripravnik postavljen za šefa

Kada je u pitanju smjena 42 direktora i postavljanje novih, Spahić tvrdi da su to poltroni novog direktora i navodi primjer kako je za šefa službe u Tuzli sa 333 uposlenika postavljen pripravnik **Edin Muratović**.

**- U pravilniku o radu lijepo piše da šef mora imati najmanje tri godine radnog staža. Osmanagić je smijenio najistaknutije ljude u ŽFBiH i postavlja takve - kaže Spahić.**

**Preuzeto sa Prtala Avaz: <http://www.dnevniavaz.ba/dogadjaji teme/19857-Nedodirljivi-direktor-eli-razgovarati-sindikata.html>**